



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 7

Yangia anidakangma :



Tir Yimiyim



tir\_yimiyim



tir yimiyim

TAPAK 8

**Vance aser Iran ketdangsürtem  
Switzerland tongogo**

**Casemiro-i Inter Miami nung  
adentsü mulunga agizükogo**



VOL. XXIII ISSUE NO. 249 (ADOK 249) DIMAPUR TENTONÜ (MONDAY) AAMI (JUNE) 22, 2026

₹ 5.00

## Naga Women's Union-i NIA dang mepishir

**Imphal, June 21, 2026 (Agencies):** Konsakhul nunger civilian 6 tepsetba atema Naga Women's Union (NWU)-i National Investigation Agency (NIA) nung Director General dangi shidi ka zülüogo.

Manipur sorkari iba ken o ya NIA nem agütsüogo. May 13 nü Leilon Vaiphei yimtsüng nungi Naga civilian 18 pur aoba rongnung parnok 6 densema liasü.

Iba tatalokba sülen nisung 12 chiok saka June 10 nü tanünga tebur 6 indang mang kanga mejungu tepseter aliba angu.

NIA-i JNIMS Mortuary, Imphal nung forensic aser DNA examinations agia arudar.

NWU-i NIA dang nisungtem pur aoertem, ozüing alema puoka ayuba, tepsetba aser kulitem miimbanga ayuba atema aibelener ajak pua arutsü takhangba agütsüogo.

NWU-isa Leilon Vaiphei village chief, nisung pur aoba nung shilem agir tetsür 30 tema aser Manipur police personnel Thanggilian Vaiphei nunger aputsü takhangba agütsür.

Thanggilian Vaiphei-i shilem agiba ya pur chiokba tetsürtemi kuli tejangia agütsüogo ta NWU-isa ashi.

NWU-isa iba tatalokba nung Suspension of Operations (SoO) agreement kübok aliba KNF(P) indang shilem jungjunga bushisüngdang asütsü ayongzükogo.

Iba ya meimchir asoshi tesasatsü aketba tatalokba ka lir aser ashishitep melii ochi bushitsübaji kangasa tongtipang lir. Iba ajanga temeten angutsü aser public-i ozüing dak tamang akatsü ta NWU-isa metetdaksüogo.

Iba ken o atema NIA-i state police aser forensic experts den külemi kulitem bushitepa arudar.

## Nagaland nung Yoga Day thinener tanü ang amunger

**Dimapur, June 21, 2026 (Agencies):** Nagaland nung kaketshir teloktem, kin hohotem, arogotem aser political party temi Deobar anogo nung amungtsü ashishitepba agi state sorkari International Day of Yoga thinenogo.

School Education Department-i shisaliok reju ajak nung June 21 nung masü saka June 22 nung ang Yoga Day amungtsü tetuyuba agütsü.

Tesüiba nung School Education Department-i June 21 nü sorkar aser nija school ajak nung Yoga Day sentongtem ayonga agitsü tetuyuba agüja liasü. Iba sentong nung kaketshirtem aser staff ajaki shilem agitsü aser GPS-tagged photographs den reports yoktsü tetuyuba agüja liasü.

Ajisüaka, Naga Students' Federation (NSF)-i iba tetuyuba magizük aser Khristantem teimba ser aliba Nagaland nung Deobar ya Tsüngrem külemba temeshi anogo ka lir ta parnoki ashi.

Deobar nung ibala sentong agiba ajanga tamangba yimsü aser temzüngi temeten agüja aliba nung kongshir ta NSF-isa metetdakja liasü.

Ano, Central Nagaland Tribes Council (CNTC)-ia iba sentong magizükba metetdaksü. Shisaliok rejutem nem tamangba yimsü mesüra sobaliba tsütsü tesentaktep aliba sentongtem nung ajak shilem magidaksütsüla ta parnoki ashi.

Maneni, Nagaland Congress aser tanga telok aikati School Education Department tetuyuba

meyipa agitsü takhangba agütsü aser arogotemia Yoga Day amungba atema ashishitepa liasü.

Nagaland Baptist Pastors' Union (NBPU)-ibo yoga ya ta Khristan tamangba yimsü den meputep aser tamangba yimsü o tangatetba nung tera yanga lir ta ashi.

NBPU-isa arogotem aser shisaliok rejutem dang iba anogomung nung shilem magitsü ayongzükogo.

Item onük nung ajemdaker state sorkari June 22 nung ang official programme agitsü thinentü telemtetba agiogo.

Ajisüaka, Centre sorkar rejutem, security forces aser tanga teloktemibo Deobarnü International Day of Yoga tenüng nung Yoga Day sentongtem ayonga agiogo.

## KIM-i NSCN-IM den ceasefire agientsü akhanger

**Imphal, June 21, 2026 (Agencies):** Kuki kintem asoshi tematiba telok Kuki Inpi Manipur (KIM)-i India sorkar dang National Socialist Council of Nagalim (NSCN-IM) aser parnok den yariteperitem den ceasefire agreements agientsü ayongzükogo.

KIM-i June 19, 2026 nü Kangpokpi nung Deputy Commissioner ajanga Prime Minister dangi iba asoshi memorandum ka yokogo.

Manipur nung Kuki-Zo aser Naga nung tsüngda tesentaktep mejungu küma aoba mapang ka nung KIM-i iba ola adoker.

Tawa mepetmesü adokba ajanga Kuki yimtsüng 11 raksatsüogo aser civilian taküm 14 samaogo ta KIM-i züluba memorandum nung shia lir.

Sorkari Kuki-Zo nunger tebilemtsü asoshi meinyaki United Naga Council (UNC) ajanga akhangba onüktem agizükra ibaji külen tsütsü shir inyakba ama asütsü ta KIM-isa ashi.

UNC ya Manipur nung Naga nunger asoshi tematiba telok lir aser parnoki kin o kin mepetmesü nung taküm samaba Naga civilian tem asoshi temeten meshir. UNC-isa Kuki telungpur teloktem den Suspension of Operations (SoO) agreement agientsü akhanger.

Kuki-Zo nunger dak ozüing alema inyakba aser amokmerenba maparen nung NSCN-IM dena lir. Anungji NSCN-IM den ceasefire agreement agientsüla ta KIM-isa takhangba agütsü.

KIM-isa civilian 14 tepsetba atema temeten meshir aser June 16 nü Songkong village nung tailla khatetba nung Lenminsang

tepsetba atema temeten meshir. Parnokisa lendong ataloktsü ana nung aliba tesemtem nung security forces mapa lemzüksütsü, Kuki yimtsüng 11 rongdoktsüba atema bushisüngdang asütsü aser Kuki-Zo nunger asoshi political settlement asütsü akhanger.

### Kuki CSOs-i highway mokdang

Deobarnü Kangpokpi nung Kuki Civil Society Organisations (CSOs) ajanga national highways mokdangtsü ayongzük.

Manipur kübok hill districts nung tawa security operations inyaka aruba nung mepelaba atema parnoki lungkak aittsü ayongzük liasü.

Sepaitemi Kuki yimtsüngtem aser local village defence volunteers dak dang temulung agüja inyaker ta parnoki tai tongloksür.

"Kuki civil society organisations tongtitemi emergency highway shutdown asütsü külemi lemtet aser iba ya central security forces-i tejak repranga security operations agiba anema lir" ta Kuki CSOs Kangpokpi spokesperson Janghaolun Haokip-i osangbener dang ashi.

"Lennirtemi aiben mepishiaka Kuki villages aser volunteers dak dang security operations agir. Lendong ataloktsü ana nung aliba tesemtem nung security peria maliba agi local village volunteers-i tebilemtsü khuret bena inyaksü tenzük" ta Haokip-isa ashi.

Sensotemi lendong ajurutsü aliba nungi community volunteers-i maneni yimtsüngtem kümzüka ayutsü anungji tensa meraksatsü mepishir ta paisa shisem.

## MP Bimol Akoijam-i state sorkar dang asüngdang

**Imphal, June 21, 2026 (Agencies):** Liangmai Naga nunger trok tepsetba atema state sorkari teinyaksü tim meinyaker aser iba ajanga sorkari iba nung shilem agi asü ta tasüngdangba arur ta Manipur Congress Member of Parliament (MP) Bimol Akoijam-i ashi.

"Taochi kecha melii nisungtem tepsetba atema ketdangpurtemi ola madoker aser

nisung shinga pua maru lir anungji ketdangsürtem shirnok kümzüka ayutsü meranger" ta Akoijam-i asüngdangogo.

Lok Sabha MP Akoijam-i Imphal nung Jawaharlal Nehru Institute of Medical Sciences (JNIMS) semdang aser telungpurtemi tawa chiokba tetsür asem den ajurutep.

May 3, 2023 nungi hill areas nung mepetmesü adoker

rarayonga aruba atema kanga süoki ia bilemer ta Akoijam-i ashi.

State sorkari mepishiba atema Centre sorkari shimtetba bushisüngdangba luden nem ano ita trok apuloktsüogo. Iba ken o ya Parliament nung benoka jembitsü aser takoksa ajuruba kibongtem asoshi temeten ngudaksütsü ta paisa metetdaksü.

## NEET Re-Exam takok ngua agiogo: Kaketshir lakh 22 tema liasü



(Abelen) June 21, 2026 nü Bengaluru nung NEET-UG candidate tem examination centre ka nung document verification & biometric authentication agir. (Achiji) New Delhi nung NEET-UG candidate ka security screening agir.

**New Delhi, June 21, 2026 (Agencies):** Deobarnü NEET UG 2026 re-exam takok ngua agiogo aser linük ajungalen candidates lakh 22.79 temai iba tatidang agütsüogo.

Tanü iba tatidang atema security maparen kanga akanga liasü aser biometric authentication, entry points nung strict frisking aser additional surveillance liasü.

NEET UG 2026 tatidang

agütsür kati ashiba agi exam paper kanga tasak liasü. Physics section talang ka liasü aser tesüiba dang nungi tasakba liasü ta pai ashi. Biology aser Chemistry tasüngdangba shitak dang liasü ta paisa shisem.

Kaketshir aikati May 3 nü NEET UG 2026 dang nungi tanü re-examination nung paper talangba aser tasakba liasü ta ashi.

Tanü NEET UG 2026 re-exam ya nikongdang 2:00 ako

nungi 5:15 ako tashi agiogo. NTA-i tesüiba dang nungi kaketshirtem nem minute 15 talila agütsüsem.

Tanü India nung centres 5,440 aser bendanglen centres 14 nung National Eligibility cum Entrance Test-Undergraduate (NEET-UG) re-examination agiogo aser candidate lakh 20 temai iba tatidang agütsüogo ta National Testing Agency (NTA)-i metetdaksü.

# Folk metal kentenba telok Sariwar-i "Noklenwar" ken sayaogo



**Dimapur, Aami/June 21 (TYO):** Mokochung nung amendaker aliba Folk metal kentenba teloki Sariwar-i June 20 nü parnok indang ken tanabuba "Noklenwar" sayaogo. Iba ken ya T. Senka Ao-i (Padma Shree Awardee) mejem aser kensü, kongki balala ajak ya Sariwar teloki mejema mangaokogo. "Noklenwar" ken ya asen tetsü-tebou, tanüla, tasü aitiba aser senmang tushia atenba ken ka lir. Asen Aoeer sobaliba aser modern metal kentenba yimya meyoktepa atenba ajanga parnoki asen puti otsü, maitsü aser otsü ashiba yimya taküm kümdaktsüogo.

Iba kentenba telok ya 2025 küm tentet, kong kentener Asung Imchen, guitar atemer Jonathan Lemtur aser Sentizulu Lkr, bass atemer Wapang Jamir, Drum atemer Imsongti aser manager Senti walling densema lir. Iba kentenba telok tenzükli nungi lenla ajak nung parnok nongita yarir ajak dang Sariwar teloki kanga pelaba lemsatepogo, aser maneni nongita yaritsü mepishiba olen ka lemsatepogo. Maneni taküm ano ken ka ana tena sayatsü asoshi iba kentenba telok ya tang tinyakdak lir, ta parnokisa metetdaktsü.

Ken ya tanganertemi Youtube nung angutsü aser July 5 nü nungi tenzüka Spotify aser Apple music amala streaming sabang tulutem ajak nung angutsü. Ken sayar ghonda 24 tsüngda views meyirejang metsü jungnüa kümogo aser maneni terpranger timba akümtsü imlar. Nagaland nung kententsü aser kongki atemtsü sempet tajung aketba kija aser telok aika rongnung Sariwar teloka ya-a ka lir, aser ken meimertemi parnoki maneni nongita yarira temaba jenjang tongteta aotsü sempet tajung keta aliba angur.

# East Dimapur Town Council-i ayongzüka senden ka amen

**Dimapur, Aami/June 21 (TYO):** East Dimapur Town Council (EDTC)-i ayongzüka parnok tazüokba kübok aliba tesemtem nung inyaksangshia aliba bank ajak nungi ketdangsürtem den senden ka menogo. Senden ya construction permits aser municipal temzüng ozüngtem sülen tashi anga-a anidaktsüba ken o tem sensak asemtsü atema ayongzüka liasü. Senden nung EDTC-i, ketdangsürtem ket nungi temelaba meshiba sülenang East Dimapur kübok tesem balala nung kisü jensü mapa balala tenzüka inyaksü kodang tongatibang iba indang lemsatep. Iba dak sendakba nung bank ajak dang, applicant temi East Dimapur Town Council-i agütsüba Construction Permit tejangja mebenok tashi kisü jensü dak sendakba nung loan kecha magütsütsü mepeshia metetdaktsüogo. Council-isa, bank ajak dang kisü jensü dak sendakba nung EDTC nungi Construction Permit agütsüba medeni loan

agütsübatem khuret ya bank-i abentsü ta metetdaktsü. Maneni Council-i ashiba agi, sentong junga yanglur terenlok maparen balala benoka inyaksü, building regulations sülen tashi anga anidaktsü aser EDTC tazüokba kübok aliba tesemtem nung temelaba magütsü kisü jensü kecha mesüdaktsütsü nükjidong nung iba jenjang agir. Senden nung shilem agiba bank ajaki teka amteper inyaksü aser terenlok maparen bentet benteta aotsü aser municipal temzüng ozüng sülen tashi anga anidaktsü atema tenüngdakba teyari ajak agütsütsü tenangzüka agütsüogo. East Dimapur Town Council-isa, ken o dak sendaka alir ajaki teka amteper inyakba atema kanga pelaba lemsatepba den nüburtem dang kisü jensü mapa kecha metenzük tsüngda mesüra iba dak sendakba nung senotsü teyari magi tsüngda tenüngdakba Construction Permit/NOC agizüktsü mepeshia metetdaktsüogo.

# State nung Assam Rifles tem International Yoga Day amung

**Dimapur, Aami/June 21 (TYO):** Linük tesem ajunga nung 12 buba International Day of Yoga amungba nung shilem ka ama Assam Rifles temi June 21, 2026 nü Nagaland tesem balala nung "Yoga for Healthy Ageing" kübok Yoga Day munga liasü. Iba sessions nung sepaitem aser kibongtem tejangraba tulu nung shilem agiba ajanga temang aser tekolok anema alitsü asoshi

yoga ya tongtipang ta angatetba sayua liasü. Yoga ya anogoshia takum yimya nung meyoktepa amshiba ajanga temang nung tajangzük angur ta angatetdaktsütsü nükjidong nung iba sentong ya ayongzüka liasü. Iba session mapang shilem agirtem dang yoga yimya balala, tango sashiba yimya aser meditation exercises tem sayua

liasü. Temang anema lia tain akumba, temang aser tekolok shidak yutsüba nung yoga agi mapa inyakba iba sentong yagi sayua liasü. Assam Rifles temi ano International Day of Yoga nüngtem nung sentong balala ayongzüka sepaitem aser kibongtem ajangzükdaktsütsü sentong lir.

# Lok Bhavannung West Bengal state Foundation Day amung



**Dimapur, Aami/June 21 (TYO):** Lok Bhavan Kohima nung June 20, 2026 nü West Bengal indang State Foundation Day munga liasü. Nagaland Angh Nand Kishore Yadav-i iba sentong nung jembidang, India puti otsü aser linük terenlok nung West Bengal ya tongtipang lir, ta ashi. Iba state ya shisashir adokdak, sobaliba asendenshidak, kenshi oshi, art, science aser lokti temelenshi adokba state ka lir, kong lenir, shisashir aser mangdang tajung alir lenir aika adoka modern India yangluba nung shilem tulu agia lir, ta pai ashi. India nüchiso asoshi nokdakba aser linük yangerba nung West Bengal-i shilem tajung agiba bilemteta jembidang, linük meimer aser shisashir aika adokba tesemji West Bengal ya lir aser parnoki linük tangatetba tajung leni melenshiba nung yariogo, ta ashi. Pai Indian national anthem mejemsang Rabindranath Tagore aser Vande Mataram ken mejemsang Bankim Chandra Chattopadhyay nung nem akhum agüja liasü. Paisa Dr. Syama Prasad Mukherjee, Ramakrishna

Paramahansa aser Swami Vivekananda nungeri mapa tajung inyaka yutsüba tushia liasü. West Bengal nung aliba nüburtemi India nüchiso bushiba mapang tongtipang shilem agiba aser parnoki bendanga agütsüba indang bilemteta jembia liasü. Linük telungjem tali adokdaktsütsü tangatetba nung Stat Foundation Day ya amunger aser iba ama sentong ajanga sobaliba, oshiooben aser yimsü balala indang tali jangjar, ta Angh-i ashi. Yimjung, terenlok aser tejakleni aotsü atema Nagaland aser West Bengal nüburtem tangatetba kasa lir aser iba anogomung ajanga tesendaktep tali akangshitsü, ta ashi. Iba sentong nung West Bengal indang angh-i salem shiokba video ya sayu, Bengal Samaj Dimapur tir Kamala Kant Paul aser Bengal Samaj Kohima tir Sudipta Kumar natia o tatsütsü jembia liasü. BBR Academy nung azünger temi Rabindra Nritya aser Bengali Folk Dance densema sobaliba tsüngsang balala agi shilem agia West Bengal indang sobaliba tajung sayua liasü.

# Immanuel College nung "AI for Productivity" seminar ayongzük



**Dimapur, Aami/June 21 (TYO):** Tanü tendak mapa inyaksangshi nung Artificial Intelligence ajanga temelenshi kanga kera bener arutsüba mapang Instudia-i Immanuel College, Dimapur den lungjemer June 20, 2026 nü "AI for Productivity" indang seminar ka ayongzüka liasü. Iba sentong ajanga kaketshir nem technology tajungba nung amshia academic aser professional tsütsü tajungba kümdaktsütsü tesayuba agüja liasü. Anogoshi inyaksangshi nung tali rangloker AI temelenshi kanga kümdanga amshitsü aser tongtipang hadir ka kümdaktsütsü asoshi shisa agütsütsü nükjidong nung

seminar ya ayongzük. Instudia indang Director, Daniel Changkija-i iba sentong nung jembidang, kera yimya süpaba aser digital yimyatem junga meteta alitsü tongtipang, ta ashi. AI ya tarutsü asoshi concept ka masü saka tanü asangsang nung amshitetba hadir ka kumogo aser yimya shidak nung amshira, tajangzük tali akumtsü, aser Dimapur nungi alima nung maangka balala agitetsü kaketshir nem bener arutsütsü ta pai ashi. Shisalen sayur Vishal Bardewa-i anir technical aser sensaksemba session agia liasü, shibai mapa aika tiptema tajungtiba nung inyaksü atema AI amshiba indang lemsatepa

liasü. Mapang kumzüktsü mechi 'Automating repetitive tasks' amshiba densema Bardewa-i AI hadir tem amshia sayu. Research aser data bendenba, mapang lemsaba, pei aginüba ama mapa ketdangtsüba sentong amala yimyatem sayua liasü. AI agi nisung tekolok shisatsü memelentsüla saka nisungi inyaktetba mapa tali tajungba kümdaktsüba ama amshitsüla, ta Bardewa-i ashi. Seminar tembanga Q&A session agi, kong kaketshir aser tesayur temi AI amshiba nung timtem aliba, data privacy aser tarutsü nung career tsütsü lenmang balala aliba indang jembia liasü.

# Yoga ya ajaki benshia taküm yimya ka kümdaktsütsüla: PM Modi



New Delhi, June 21, 2026: Amongnü International Day of Yoga anogomong nung Parliament House complex nung yoga aidang tangokba noksa nung angur.

## New Delhi, Aami/June 21 (Agencies):

Amongnü International Yoga Day anogomong nung Ato kilonser Narendra Modi-i, yoga ajanga nisung ka temang anema lidaktsüba dang masü saka iba ya alima nung yimjung atema lenmang ka lir, ta ashi.

Paisa tanur-tain ajaki yoga ya benshia taküm yimya ka kümdaktsütsüla, ta ashi.

Bhagwat Gita nung ajemdaker Modi-i, mapa inyakba, chiyungtsü achiba aser amoi aoba ajak liromedemtsüla, ibaji ajanga dang timtem samatsü aser ibaji yoga-i lenitsü, ta ashi.

"Tanü putu nung nisung teimbakati libaliro liromedema alitsü makoker. Yoga ajanga liromedema libalirotsü sayur; iba ya ajanga asenok dang teinyaktsü aser meinyaktsütem sayur. Kodang asenoki asen temang shidak amshitsü angazükdir ibaji taküm yimya ka kümadoktsü," ta pai ashi.

Modi-i, "Teinyaktsü aser meinyaktsütem jangjaba ajanga temelungjang nung tesünep bener arutsüba dang masü saka iba ya ajanga alima nung

yimjung atema-a lenmang lapoktsür. Ibayongji yoga ya asen nija libaliro atema nüngdakba dang masü saka iba lima tarutsü tajungba akümtsü atema-a nüngdak," ta ashi.

"Asenoki yoga ya anogo ka kija mesüra sentong ka kija nung aiba dang masü saka asen taküm nung shilem ka kümdaktsüdi, asen kibongtem aser tarutsü lanurtem atema shilem ka kümdaktsüdi," ta Ato kilonseri metetdaksü.

Yoga anogomong nung linük Tir Droupadi Murmu-i Madhya Pradesh kübok Jabalpur nung ayongzükba sentong nung shilem agi. La den Madhya Pradesh Angh Mangubhai Patel aser Chief Minister Mohan Yadav nata liasü.

Delhi nunga LG Taranjit Singh aser chief minister Rekha Gupta na leniba nung International Day of Yoga sentong nung shilem agi. Delhi nung iba sentongji Asola Bhati wildlife sanctuary nung agia liasü. Iba sentong nung environment minister Manjinder Singh Sirsa den tongti ketdangsertem aika aden.

Punjab nung iba anogomong sentong nung BJP Tir, Nitin Nabin-i lanurtem dang yoga ya anogo shia benshibia shilem ka kümdakjang ta ayongzük. Paisa Punjab nung temesepba mozü tebilemstü lemsatöp aser iba ya tera nungi atsüteta indoktsüla, ta ashi.

Andhra Pradesh nung ayongzükba sentong nung chief minister N Chandrababu Naidu aser yoga tesayur Baba Ramdev na leniba nung shilem agia liasü.

Chief minister-i, Swarna Gram aser ward secretariat office tem nung yoga aitsü atema hall temeja amenoktsütsü aser yoga sentongtem achaayangtsü atema district aser mandal-level nung ketdangsertem shimtsü; iba dak alia yoga inyakyim latettsü atema mongin committee ka tentetba den külemi Yogandhra portal ka tenzüktsü, ta metetdaksü.

Yamaji iba anogomong nung linük tesem ajaklen union minister tem, state minister tem aser tongti ketdangsertem leniba nung nisung aikati shilem agiogo.

# Tanü India tesem ajaklen NEET tatidang agiogo

New Delhi, June 21 (Agencies): Taküm May 3 nü NEET tatidang agiba sülen paper leak asüba jangjaba agi iba tatidangji tamagila kümtsü aser Amongnü kasa tatidang tanaben agishiogo.

Amongnü anepdang Union Education Minister, Dharmendra Pradhan-i kaketshirtem dang kecha marendaki iba tatidang agüjang, ta ajungshia liasü.

Pradhan-i, iba tatidang junga ketdangtsü agitsü, ta pai National Testing Agency (NTA), state sorkartem, district administrations aser kaketshirtem dak tamang akar, ta ashi.

"Tanü mapang tatsüka tsüngda kaketshir lakh 22-i NEET tatidang agütsütsü. Parnoki metsübu mesüra kecha marendaki tatidang agütsütsüla. Parnoki tatidang junga agütsütettsü," ta pai metetdaksü.

Iba tatidang ya nikongdang 2:00 ako nungi 5:15 ako tashi agiogo.

National Testing Agency

(NTA)-i kaketshirtem dang admit card, photo ID aser passport-size noksa anana bener anüngdang 11:00 ako nungi nikongdang 1:30 ako tashi nungbosa exam centres-i arung, ta metetdakja liasü.

Education Minister Pradhan-isa, "India nunger putu tasenba lanurtem den masayatsüla. Parnok tekolok shisatsü kongshitsü kecha teinyak. Ghonda ishika tsüngda tanurtemi tatidang agütsütsü," ta metetdaksü.

NTA-i, iba tatidang ya India nung aliba yimi 551 nung centre 5,440 aser bendanglen aliba centre 14 nung agitsü; iba tatidang ya English oshi aser India nunger oshi 12 nung agitsü, ta metetdakja liasü.

Item exam centre nung candidate tem temang mita repranger staff 38,795 aser biometric mita repranger 48,448 liasü.

Exam centre shia nung centre systems officer (CSO) kaka lemsüktsü, observers 6,700 liasü aser centre ajak nung CCTV liasü.

# CJP-i aluyimertem dang longkak aitba nung shilem agitsü mepishir



June 21, 2026 nü New Delhi nung Cockroach Janta Party (CJP) pusemertemi tanünübuba longkak aitag tangokba noksa nung angur.

## New Delhi, June 21 (Agencies):

India nung NEET paper leak asüba aser exam balala nung ochimashi aliba anema Delhi nung aliba Jantar Mantar nung tanü agi tanünübuba longkak aitba mapang Cockroach Janta Party (CJP) tentetsang, Abhijeet Dipke-i aluyimertem dang longkak aitba nung shilem agiang, ta mepishi.

Dipke-i, tamalen aluyimertemi longkak aitba mapang nung kaketshirtemi pusema liasü, anungji tang kaketshirtemia aluyimertem teyari nüngdaker, ta ashi.

Honibarnüa lanur noklang aikati Jantar Mantar nung longkak aita liasü saka nikongdang 5:00 ako tashi nungbo police-i longkak aiterem dang iba tesem toktsür oang, ta metetdakja liasü.

Ajisüaka Dipke den longkak aiterem aikati aonung piyong iba tesem nungjagi mainshi aser Amongnüa parnoki maneni longkak aita Union Education Minister Dharmendra Pradhan-i menden nungi anentsüla, ta takhangba agütsü.

Dipke-i longkak aiterem dang Jantar Mantar-i arua longkak aitba nung shilem agiang aser NEET tatidang agütsürtemia tatidang

tembangba sülen arua maneni shilem agiang, ta ayongzüka liasü.

"Onoki iba mitsa metoktsür, ajisüaka nenoki pu-mesemra iba tongbang ya takok mangutsü," ta shia pai Amongnüa longkak aitba nung shilem agiang, ta mepishi.

"Ni India tesem ajaklen aluyimertem dang yagi arua Jantar Mantar nung kaketshirtem pusemang ta mepishir," ta pai metetdaksü.

Dipke-i X ajanga police dang, Jantar Mantar-i nisungtem aruba menokdangtsüla, kechiyong longkak aiterem ozüng alema meinyaker, ta metetdakja liasü.

Paisa ketdangsertem dang longkak aitba tesem nung longkak aiterem metsü-meshitsü atema tzü supply agüjang, ta mepishi.

Honibar nikongdang Delhi police-i Dipke dang, longkak aitsü atema anepdang 10:00 ako nungi nikongdang 5:00 ako tashi dang temelaba agütsü, anungji nenoki iba tesem toktsür aotsüla, ta metetdakja liasü.

Ajisüaka Dipke den longkak aiterem aikati iba tesem metoktsü aonung piyong longkak aitba sülen Amongnüa maneni longkak ait.

# Tamil Nadu nung ammonia gas leak lendong nung tetsür 7 asü

## Chennai, June 21 (Agencies):

Amongnü Tamil Nadu nung Periyapalayam anasa Manjanganani nung aliba seafood processing factory ka nung ammonia gas leak asüba lendong nung tetsür tenet süogo, ta ketdangsertemi metetdaksü.

Gas leak asüba ajanga

mejungi kongshir nisung 67 local medical centres-i anir aoba sülen parnok nisung 9 bo maneni Chennai nung aliba Government Stanley Medical College Hospital -i anir ogo, ta Thiruvallur District Collector, S Kavitha-i metetdaksü.

Doctor kati, iba factory nungi anir arurtemji teimbaka tetsürtem

aser lanurtem lir, ta ashi.

District Collector, Kavitha-i factory aliba tesemji semdangba den külemi hospital balalai oa takoksa angurtemji ajuruogo.

Valve pokdangba sülen gas tamajung leak asüba aser iba factory nungji iba ama lendong ataloktsüsa akümba kuliji bushisingdang tenzükogo.



June 21, 2026 nü Bengaluru nung Congress party senden ka nung party lenir, BK Hariprasad-i Karnataka Pradesh Congress Committee (KPCC) Tir mapa agizükba sülen tangokba noksa nung angur. Kasa noksa nung Karnataka Chief Minister DK Shivakumar, Congress national Tir Mallikarjun Kharge, taoba Chief Minitser Siddaramaiah, party MP Randeep Surjewala aser tangartem angur.



## TIR YIMYIM YIMOBILEM (EDITORIAL)

DIMAPUR MONDAY, JUNE (AAMI) 22, 2026

### Yoga melen !

**Y**oga ia temang kolakosütsüba yabo tajung saka Yoga tenzüksa aser tembangba maparentem ya Hindu yimsü den sentaktepa aliba agi, talisa, Khristan purtem aikati magizükteter aser ajia shitak dang lir. Ajisüaka, tanübo asenok tangatetba putu nung alir asünungji Yoga dak asenoki magizüktettsüsa kechisa lir itemji endoker, ano asenok asoshia tagizüktettsü kechisa lir, itemjibo asenok temang anema alitsü asoshi dang masü saka temang tereprangtsüa junga alitsü asoshi anogo shia inyakba mapa ka kuma benshi nung koda jungla ta bilemer. Tanübo tsurabur putu nung ama masü, asenok mapa inyakertem aika temang arazüka asentsü sentoka mapa meinyaker, iba jagi mapabo inyaker saka asentzü mesentokba agi temang nung tashidak balala atemer aser temang tereprangtsüa kecha mejungi tebok chizüker asema aoa majung aser angüma melutet ta timtemba purtem aika lir. Aji oda, kodang temang nungi asentzü meindokba ajanga asen temang nung tashidak agi tongdir, asenok tali azümesenba akümtsü aser temang agi dang masü saka tokolok agia mapa junga meinyaktsü, anungji terateta meratettsü aser telemtetbaa yakyak ta magitettsü. Iba jagi nisung ka tangar memenep akümer aser nisung kati tangar memenepba jagi kin kati tangar kintem memenep rajang akümer. Iba kinji asenok lir. Item ajakji rajema tang nungi, talisa, lanurtema tokolok dang masü saka temanga belemdakja arakzüksü aser asentzü sentokdaksütsü asoshi Ao Baptist Arogo Mungdang nungi lanur lenirtemi lanurtem nem temang shitak yuteta anema alitsü merangdaksüba sentong ka "ABAM Fitness Project" tenzükbaji putu dak apet lanurtem asoshi sentong tajung ka tenzükogo. Atangji, ibaji Yoga melen asen dak apet temang arakzüka "exercise" agiba sentong ka asütsü. Tajung kaji, tanü putu nung ya taintem azümesen aser majung dang ashi, tanur aser lanurtembo junger, parnoki yi majemer, moko machir aser tamachiyongtü nungi pilaa alir. Aji oda, parnok aikati anepdang aonung jajaba mapang agir, Gym-i aoer aser asaya tapu balala asayar. Ashiko, asenok kibong aika alima rongsen tsütsü timtema dang alir asünungji, sen endoka Gym-i moutetba tanurtema aika alitsü, ajisüaka sen meindoki temang arakzüka asentsü sentokba exercise-a tapu aika lir. Item rongnungji Yoga yaa ka lir, Ajisüaka, tamangba tsütsü nungi asenoki Yoga magizükteter, anungji Yoga melen Yoga dang nungi tajungba asenok Khristan lanurtemi tang ABAM lanur lenirtemi tenzüksa sülenji anidaka asenok nisung shia temang shitak alitsü asoshi 'physical exercise' tenzüksüla. Asenoki Yoga dang aija temanga marakzüi chiyongli kazüli ta ali nungbo putiri anir lanur tanubusang aser tanutsüla tashiji longa aoa majung chizüker diabetes aser blood pressure agi kecha inyak majung akümtsü. Aji oda, kecha inyak majung teimba ser aliba purtem loktiji koda tejakleni aotsü? Tangar sen jang kata meindok ser anogo shia mapang ka agiteta jajaba aser asema agi anema aliba dang masü saka asemtepa nung alima nung tekaratiba jenjang tongteta nungtugu akümba otsü asenoki meteta lir. Nisung ya jajatsü atema teyangluri tetsüng keta yanglu saka tanü asenoki tetsüng agi mejajar, iba jagi tetsüng süadoker. Kasaji, nisung ya mapa inyaktsü asoshi teka yanglu saka asenoki teka agi mapa meinyaker, anungji teka agi bena arua chiyongtsü mangu timatemer. Ajisüaka, kodang asenoki anogo shia ghonda kabo tetsüng agi jajadir aser temang nungi asentzü alutsüsa teka agi mapa inyakdir, asenok temang anema aser topur junga aliba dang masü saka asenok taküm nungdak agi manungtsü, kechiyong tetsüng agi jajaba aser teka agi inyakba jagi azümesen tanela aridoker, tokolok chiradaksür aser temulungjang tashi itdaksür. Yoga-ia yamaji sayur. Aji oda, asenokbo tang nungi Yoga den tokepa temang anema alitsüba dang masü saka tebok mechizükdaksüi temang ayangayanga tashi itta alitsü aser tokolok pezübelema meyutsüi teti tajung bilema mazüngi yutsütsü merangdi. Atangji, arogo nung Sports Ministry lir, saka ibaji küm nung khen Sports Week alitsü atema masü saka anepdang aser nikongdang shia lanurtemi anir taintem dena temang, tokolok aser temulungjang arakzüdakja jajaba, asema aser asayaba sentong ka asütsüla. Idangji dang asenok shitakba tamang aser mapa nung tejakleni aoba nübortem kümadoktsü.

## OLEMSABANG

### TEBUTEMAJAKI KIBONG KÜMZÜKTSÜ 'TAMANG RONG' RENEMTSÜLA

- L. Kika Pongener

(Yashi adok nungi...)

**3. Rong yanglutsüba tasazük ajakji Tsüngremi agütsü (Lipok-6:15) :** Rongji metong suklep-300, lenden suklep-50, azük talang suklep-30 aser kichiba keta yangluang....Aser tiplenji kishi yangluang ta ashi. Aser ano teküpoklen, tanabuba aser tasembuba ta taren-taren atongtepa (Storeyed) takdang keta yangluang ta ashi. Tasazük 'Estimate' ajak |Tsüngremi agütsü.

**Lesson :** Khristan kibong aser khristan taküm ka alima nung lia aotsübaji; asenok taginuba aser tejangraba, mesura asenok sentong nung masü; saka Tsüngremi sayuba, Tsüngremi mulungba sentong nung alitsüba lesson angur. Tsüngremi koma lidaktsünur (?) Iba tasazük (Estimate) nungji dang alitsüba lesson angur. Tsüngremi lenden, metong, azük talang, takdang, kishi lapoktsü tasazük agütsübaji... 'Laishiba' Tsüngrem o ya asütsü. Tsüngrem o-ji tasazükji asütsü. Anungji kibongji laishibai melaba, laishibai tuyuba aser laishibai sayuba...Iba tasazük (Estimate) nungji dang alitsüba lesson angur.

**4. Noah'er kibong ajunga rong jagi atu (Lipok-7:13) :** Noah den par chirtem Ham, Shem, Jafet, Noah kinungtsü aser par jabaso asem kinungtsü ajunga tzümetsüng nungi kümzüksü Rong jagi atu. Aji oda, Noah'er kibong rangben Rong jagi atu.

**Lesson :** Iba alima temenen nungi asen kija dang masü kibong nung alir ajunga kümzüksüba....Apuani külemi, chirnur ajunga kümzüksü; tebu kati 'Tamang Rong' renemtsüla. Tanü khristan kibong aika kinungtsü-bo kümzük, kinungtsübo tamang nung tashitait, kanga bendanga agütsüba tamang....Saka kinungbu-bo yi-lar, mozü-lar aser moko-sali lar...Mesura tsurabur-bo kümzük, saka jala-jabaso-tembo mekümzük....Kar mozü-lar, kar yi-lar, kar nuktapangda agi menaba manepetba tashitak 'HIV & AID'S' agi kangshir....ta kibong aika lir. Ano tanübo chirnurtem Science and technology agi bener aruba mapatem Smart Phone & Social Media item lar.....ano karbo LGBTQ+ iba lar. Anungji Noah-i kibong rangben kümzüksü rong renemba ama...Tebu kati kibong rangben kümzüksü 'Tamang Rong' renemtsü lesson angur.

Noah-i Tsüngrem-i ashiba anga-a Rong yangludangji....Par nubur ajungai atala-a, sensaja, menutsüba asenoki laishiba nungji angur. Ashiko, Noah na yiar kümogo ta-ka sensamasa-a menutsür alitsü sudi....Saka Noah-i Tsüngrem dak tamang yur shinga ola mangai Rong-ji yanglu. Kechiyong Noah-i alima ajunga tzü-metsüng agi samatsüba Tsüngrem'er miim o-ji chichia meteta liasü....Yongji, Noah-i Tsüngrem dak akang-akanga tamang ayu; kechiyong pa tamangtir ka liasü. Tanü putu nunga Khristan kibong aser taküm ka aibelentsüsa tatidang sang jenti lir....Item temenen tatidang sang nungi kibong ajunga kümzükka kodaki anitsü asoshi kibong nung tebu ka khuret tulu lir. Tanü lanurtem balaka 'Science and technology' ajanga bener aruba tatidang sang jenti lir. Anungji Khristan kibong ka aser Khristan taküm kaji Noah'er Rong ama....Tzü-metsüng koba-teka tesashiba aru....Patak-kaji tali-tali temaleni atuba ama....Koba-teka tatidangba arur patak-kaji tamang tashi taitba; tanela nung aintsü aser atsüngzüka maotsü; Tsüngrem dak akang-akanga soitba kibong ka asütsü kanga nungdaka kümogo. Tanü ama putu tamajung ka nung; kibong nung tebu kaji; Noah ama Tsüngrem'er miim o metetba tamang-dir ka asütsüla. Kibong nung tebu kaji Tsüngremi tamang kaatettsüsa Tsüngrem dak chichia azüitba taküm asütsüla. Tebu kati Noah-i kibong rangben kümzüksü 'Rong' yangluba ama....Kibong rangben kümzüksü 'Tamang Rong' renemtsüla.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Fred Jordan Missions nung missionary Willie L. Jordan süogo



Willie L. Jordan

**Los Angeles, June 21 (Agencies):** Fred Jordan Missions nung taoba mapang Tir aser missionary, Willie L. Jordan alima nungi pilaogo; la arrshi küm 93 liasü.

June 13, 2026 anepdang Glendora, California nung lar lidang lia la süngjema amozüka ao.

Küm 75 tashi lai samaba tanelatem nem teimla agütsü aser sensakertem yaria aruogo.

Fred Jordan Missions Tir aser lar jabaso, Joe Jordan-i, "Kütsü lar kidang lia tesünep nung amozüka ao aser la saakba mapang nungbo Yisui la dang 'Junga inyakogo, kü tenzüker tajung' ta shiogo," ta metetdaksü.

"La küm 93 tashi alima nung ali, kübu Fred den kibong kümer jangratema ali, chirnur tenet sosem aser Yisu temeim ajanga alima tesem ajaklen nisung million aika tenzükogo. Lai alizüing tonga asemogo aser tangbo hon agi menokba lenmang nung Yisu den külemi jajadar," ta lar jabasoisa metetdaksü.

Joe-i, "1944 küm tenzükba mission wadang maneni tongzükba inyaktsü maangka anguba ya ni asoshi akhümket. Tesüiba küm 82 tashi iba mangdang yur inyaka arudar. Onoki nungdabapurtem aser teimla samar alirtem den Yisu temeim lemsateper. Yisu Khrista aser Kodaker Tebu temeim lemsateptsü aser samaba tanelatem aser sensakertem dang aria meimtsü atema onok dang sayuba atema onoki nü dang pelar, Oja. Ni na teti menungratsü, ajisüaka kobi melii asenok ajurutsü ta ni metet," ta metetdaksü.

Willie Jordan arrshi küm 13 asüba mapang nung Tsüngrem temeim lemsateptsü atema Tsüngremi la jateta liasü, aser arrshi küm 15 asüba mapang nungbo lai Southern California

nung aliba Arogotem nung sayutsüngi tenzükba liasü.

High school azüingba sülen lai America tesem ajaklen sema lanurtem dang tangar tenzüksü atema taküm bendanga agüjang ta tayongzükba agüja liasü.

Korean War tembangba sülen mapang tatsüka dang lir Korea nung lai tanur ka kümzükba anasa aliba hospital kati anir ao saka tanurji südaok.

Iba tatalokbaji ajanga la kanga kongshia liasü. La United States-i meyipa aoba sülen senotsü benden aser ita tenet shi lir la tanaben Korea-i meyipa ao. Lai Korea nung lajartem yaritsü atema orphanage ka lapoka liasü aser tangbo iba orphanage nungji tanur 500 dak tali anepalua yariteter.

Shi aser tanela naprongla nung yaseta tzürartem yaritsü atema Willie-i melungteta liasü. Ajioda 1944 küm la kinüingbu Fred Jordan tenati Los Angeles kübok Skid Row nung American Soul Clinic amenok.

Willie aser la kinüingbu nati Los Angeles nungi tenzükba alima tesem balala nung Tsüngrem temeim lemsatepa Japan, Liberia, Hong Kong, Argentina, Taiwan, Mexico aser Ghana linüktem nung orphanages, schools, mission stations aser Arogotem tenzükja liasü.

1951 küm tenati television program, "Church in the Home" tenzükba liasü. Iba program ajanga lai iba sentong repringertem dang Yisu sülen anidaksü ayongzükba aru.

1988 küm Willie kinüingbu Fred süadokba sülen lai maneni mission mapa inyak aser Skid Row nung amenoka aliba mission nung Tir inyaker tetsürji la dang liasü. Fred nem akhüm agüja iba mission nungja Fred Jordan Missions ta melen.

1989 küm lai Mission mangdang ulushia tetsür aser tanurtem yaritsü atema

Footlocker den senteper Back-to-School tenzükba liasü. La lenisüba nung Mission-i anogo shia sensaker 1,000 jungnüa nem chiyungtsü agütsü aser tanur meyrjang ka jungnüa nem back-to-school süoshi agütsüba den külemi inner-city camps, discipleship programs aser Bible studies ayongzükba katsü.

Iba Mission indang 'Holiday Celebrations in the Streets' kübok anogo shia nungdakba kibong 20,000 nem teyari agüja liasü, aser ibaji major corporations, schools, universities, Arogotem, yimten lenirtem aser celebrities den senteper inyak.

Tanur tenet tetsü Willie-i, "Ni tepela tulutiba agubaji ni yarirtem tenük nung ranglokba mapang liasü. Onoki ozü tanurtem tila asüdangyongi Skid Row-i anir ao. Ozü chirnurtem anir aobaji parnok nem Tsüngrem temeim metetdaksütsü aser nungdabapurtem aria meimdaksütsü atema liasü, aser iba atemaji kinüingbu Fred künati teti sarasadema liasü," ta metetdaksü.

2018 küm Willie-i lar jabaso Joe nem Fred Jordan Missions bendanga agütsü.

Willie Jordan-i chirnur tenet, semchirtem aser tanaben semchir aika toktsür pilaogo.

# ANOGO ABEN TSÜNGREM DEN

## Tatembang ajanga temelenshi

"Shibai nenok aja Pa temulung lemtettsüsa lir, aser Pai aji inyaktsü." I Tesa. 5:24.

Tetendangba makai ajungbaji kechi temulung lemtettsü ali? Tamang katetba tetendangbaji shitakba nung, ni kechi nangzük aji inyakba. Peteri Yisu kodanga metoktsütsü ta asüküma ashi. Yisui pa asemben tendang. Peteri tamakok angu. Kanga kua ajep. Tekong 23 nung, Pauli Khrista maru tashi Tsüngrem tesünepi parnok meshiteta yujang ta mepishi. Pauli aji Tsüngremi inyakdaksünü; aser asenoki bilemer; saka shitakba nung aji ataloktsü asü masü? Tanela Temeshi-i sayua Pauli "Pa temulung lemtettsüsa lir, pai aji inyaktsü" ta inoktsü.

Pai inyaktsü ta aseni bilemba ama pai meinyakra pa mulung lemtetba nung atidakba agi asenok tendangtsü. Saka Tsüngrem mulung lemtet memelenshir, iba indang asen tangatetba dang melenshir. Laishiba nung Tsüngrem den jajar anogo shia tendangba sayur. Tsüngrem nükjidongji parnok tabensa küma indaksütsüba. Parnok dang masüngdangi Pai parnok taküm yanglushitsü, aser kasaji Pai asen taküm nunga inyaker. Tsüngrem Pa nükjidong, Pa inyakyim, aser Pa temoatsütem, aser item ajak Pa dang masüngdangi marur ta asen dang bilemtetdaksüba nung temulung lemteta lir. Kenü kodang asenoki Pa tejak ngudir, asenok Pa mesüka alitsü. Pai aji inyaktsü. Pa temulung lemteta lir. Asenoki aji tatem anogo nung inyaktsü melatsü akok, mesüra anogo shia tetendangbaji agizüka, Pa mesüka tali akümstsü akok.

Oba, Ne mulung lemtet onoki angazüktsü asoshi zülua yutsüba atema Ne tenüing asanger ta asenoki shidi aser ashiba amaji shidak alitsula.

# Russia nunger drone ajanga Ukraine nung Tenla ki ka raksatsü



Ukraine nung aliba Pechersk Lavra monastery nung Dormition Cathedral Tenla ki arongba noksa nung angur.

**June 21, 2026:** Anogo ishika tejaklen Russia nunger drone ajanga Ukraine nung Kyiv-Pechersk Lavra monastery nung aliba Tenla ki raksatsüba atema Arogo nung lenirtemi sashia aitsüogo.

Ketdangsertemi ashiba agi, Russia nunger Shahed drone ji ajanga Dormition Cathedral Tenla kiji raksatsü. Iba Tenla ki ya UNESCO World Heritage site ka lir aser Kyiv nung aliba Monastic Caves complex nung tongti kiojen ka lir.

Orthodox Church of Ukraine nung tongti, Metropolitan Epiphanius-i, "Russia nungeri tang drone amshia amaker aser ibaji ajanga June 15 aonung Khristan lima nung temeshitiba tesemrongnung ka - Dormition

Cathedral of Kyiv-Pechersk Lavra raksatsüogo," ta metetdaksü.

Russia nungertemi amakba ya Herod Chubaer sepaitemi amakba ama lir, ta pai ashi.

Paisa, "Iba temeshi tesem kümzüktsü atema sarasademjang ta onoki mepishir. Russia nungertemi maneni meimchirtem, puti otsü aser Khristan yimsü anema inyakogo. Khrista anemer Russia nungertemi alima atema kechi inyaktsütet. Russia-i Ukraine anema kiralongraba ya anentsütsüla aser yimsü anema inyakba tangatetba ya anentsütsüla," ta ashi.

Lavra monastery ya 1051 küm yangluba lir aser Eastern Christianity nung monastery

tejentibatem rongnung iba ya densema lir.

Ukraine sorkaria, Russia nungertemi drone amshia amakba ajanga Dormition Cathedral aser anasa aliba Mystetskyi Arsenal art museum raksatsü, ta metetdaksü.

Firefighters 140-i ghonda pongu tashi nung ang item kiojen arongba miji ensepteta liasü.

Ukraine sepaitemi ashiba agi, Russia-i ballistic, cruise aser anti-ship missiles 70 amshiba den külemi drone 611 amshia Ukraine amak, aser item tatalokba nungji nisung 11 asü aser 53 yiru.

Taküm January ita tatembanglen-a Russia nungeri drone amshia amakdang iba monastery complex raksaja liasü.

### AO OSHI ANGAZÜKDAK:

#### TANÜ ANGAZÜKTSÜBA OJANG



#### Yimsoshiba

(n) loktilibaren nung temelenshi adokba ( social reformation)

\* Tanü asen loktiliba nung yimsoshiba nüngdaker.

#### Yimsü

(n) nisungtemi tanela tsütsü agizükteta amangba (religion)

\* Khristan yimsü agi asenok nem tanela tekümtet agütsü.

### OLONG PAITEP # 7542

	1			2	3		
4			5				6
					7		
	8						
	9		10			11	
					12		13
14							
					15		

#### TIPLÉN

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsü mapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

#### LANGTSÜNGLEN

- 1. \_\_\_\_\_ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. \_\_\_\_\_ kibur - (5)
- 13. Tebur tembar tsüngda jatepba - (4)

### OLONG PAITEP # 7541 TELANGZÜBA

#### TIPLÉN :

- 2. Pongsen, 5. Lepko, 7. Omen,
- 8. Maongka, 10. Yangkhu,
- 12. Senpong, 14. Angu,
- 15. Raksa, 16. Arameso

#### LANGTSÜNGLEN :

- 1. Alimang, 2. Pongen, 3. Samaru,
- 4. Nün, 6. Pio, 9. Nüngdak,
- 10. Yongya, 11. Kongro, 13. Ora,
- 14. Ata.

### NAI-A YA METETTER



Bihar nungi Jagdeep Narayan Kumar-i "World's Smallest 3-Inch Pen" atema alima otsü tasen ka yangluogo. Jagdeep ya antiques bendener ka lir aser tesüiba nunga record books nung pa tenüng züluoka lir. Ajisüaka pai pen 500 shi bendena aliba nung three-inch pen ka atema Influencer Book of World Records nung tawa tu züluokogo aser iba atema June 14, 2026 nü Science Centre, Jaipur nung pa nem sempet agütsüogo.

Jagdeep-i brass agi dang yangluba three-inch pen ya 1990 nung Rs 20 agi aliba liasü.

## July 6 nungi 31 tashi Assam Budget session alitsü



**Guwahati, June 21, 2026 (Agencies):** 16 buba Assam Legislative Assembly indang Budget Session July 6 nungi July 31, 2026 tashi agütsü.

State sorkari July 10, 2026 nü 2026-27 financial year atema Budget benoktsü sentong lir.

Assam Legislative Assembly Secretariat ajanga tentative schedule lemsatepba nung July 6 nungi Budget session tenzüka agütsü aser customary business, obituary references, laying of reports,

introduction of official bills, aser consideration of supplementary demands for grants amala mapa inyaksü.

Iba Budget session nung tongtipang mapa kaji Annual Financial Statement agütsüba asütsü. Budget benokba sülen Assembly nung anogo asemnü July 13 nungi July 15 tashi o atsütepa jembitsü ta Assam Legislative Assembly Secretariat - isa metetdaksüogo.

Iba sülen July 16 nungi July

21 tashi brief recess ka alitsü aser iba mapang Departmentally Related Standing Committees (DRSCs) ajanga department balalai agütsüba demands for grants reprangshimtsü.

Iba sülen July 22 nü departmental expenditure proposals aser voting on demands for grants atema olemteptsü aser July 23 nü voting maparen tembangtsü aser Assam Appropriation Bill, 2026 benoktsü imlar.

## Manipur Assembly election nung Shiv Sena (Shinde)-i tokteptsü

**Imphal, June 21, 2026 (Agencies):** Eknath Shinde-i aniba Shiv Sena teloki Manipur Assembly elections nung tokteptsü osang metetdaksüogo.

Sangküm February ita Manipur Assembly elections agütsü sentong lir aser Shiv Sena-i constituency 35 tema nung tokteptsü.

Iba osang ya Shiv Sena Manipur unit president M. Tombi Singh-i metetdaksü aser pai party indang electoral strategy aser political objectives lemsatep.

"Taruba Assembly elections nung onoki candidate 35 tema toktepdaksütsü. Onoki ali kümzüa yunür aser

state nung terenlok bener arunür. Tanga political party temi tang mepetmesü adoka aliba asoshi mapa tajung meinyakteter anungji Shiv Sena ama tanga political forces nem maongka agütsütsüla" ta Singh-i ashi.

Züngsem 60 agi akümba Manipur Legislative Assembly nung Imphal Valley nungi menden 40 aser hill districts nungi menden 20 lir.

Shiv Sena-i Assembly elections nung takok tajung angutsü nükjidong lir. Onoki Manipur tesem balala nung organisational base akangshir aser election nung takok tajung angutsü amanger ta Singh-isa metetdaksü.

Assembly elections dak alia Shiv Sena-isa Manipur nung Panchayat elections nunga shilem agütsü renemer.

Panchayat elections agütsü osang sangdongra candidate 30 tema tokteptsü ta paisa ashi.

Manipur nung Panchayat elections ya October 1 nü agütsü imlar.

Manipur nung kin o kin tsüngda mangatettep adokba aser politics tsütsü kechi tia ajurusü memeteti aliba mapang ka nung Shiv Sena-i iba osang metetdaksüogo.

Manipur nung political party aikati Assembly elections atema renemshia organisational activities aser outreach programmes tenzüka inyakdar.

## LGBI Airport nungi Dharapur tashi cultural corridor yanglutsü



**Guwahati, June 21, 2026 (Agencies):** Assam sorkari Lokapriya Gopinath Bordoloi International Airport (LGBI Airport) aser Dharapur sendaktepba four-kilometre cultural corridor ajanga sobaliba senmang sayutsü.

Assam nung sobaliba temeyoktep sayutsü maongka ka lir aser iba ajanga alima

balala nungi arurtemi sobaliba senmang angutsü ta Assam Cabinet Minister Bimal Borah- i ashi.

"Mapang kabo Assam sobaliba rongsen ya kidang dang benjungtep. Tanübo alimai süngmanga repranger" ta Borah-i ashi.

Airport nungi Dharapur tashi lenmang ya Assam civilization

indang "living tapestry" akümtsü aser idakji sobaliba ken, tsüngsang aser inyaksangshitem sayutsü.

Iba cultural corridor ajanga Assam senmang, temeyoktep aser maitsü sayutsü ta Borah- isa metetdaksü.

Chief Minister Himanta Biswa Sarma-ia Borah indang post lemsatepogo.



Switzerland nung Lucerne anasa Buergenstock nung press center ka nung osangbener tem mapa inyadng tangokba noksa ka yangi angur. Islamabad Memorandum of Understanding (MoU) kübok United States aser Iran tsungta technical-level jembishinü yangi Deobarnü litar.

## Taiwan nung anogo pongu atema military drill ayongzüka agitsü

**Taipei, Aami/June 21 (Agencies):** Taiwan military-i ayongzüka iba hopta anogo pongu atema rara asoshi renema atatsü atema drill ka agitsü, ta defence ministry-i Deobarnü metetdaksü. Taiwan military training ya rara asoshi renema alitsüba dak rangloker agitsü asoshi inyaktepba nung shilem ka ama tang iba drill ayongzüka agitsü lir.

Taiwan koba China-i parnok meyong ta ashir parnoki ashiba agi, Chinese sovereignty agizükdaksütsü atema China indang armed force tem mapang shia parnok meketa anüng aser tzyim

China-i parnok meketa agiba exercise tem ya kar ajungbena meyiper parnok amak tenzük nungbo iba atema renema alitsü asoshi Taiwan military-i drill karbo benoka inyak tenzükogo.

"Immediate Combat Readiness Exercise" ya Hombarnü tenzüksü aser Hokolbarnü tashi agitsü, ta defence ministry-i ashiba den drill ya annual training plan nung shilem ka asütsü ta shisem.

"Nükjidong tongtibangtibaji unit tem jenjang ajak nung raratsü atema renema toktsütsü asoshi lir," ta ministry-isa shisem.

Iba inyakyim ajanga yimjung nung aliba nungi ajungbena rara-i meyiptsü asoshi teyari agütsütsü, ta kasa sangdong ajanga metetdaksü.

Iba ajanga command mechanisms aser sepaitem raratsü asoshi tali tajungba arangtetsütsü, koba joint operations command aser control, logistical sustainment aser raratsü atema renemtsüba dak rangloker agitsü, ta ministry-isa ashir.

China-i Taiwan anasai military tayimtsü aika yokogo ta metetdaksüba kasa anogo ministry-i iba osang ya sangdonga liasü.

## Ukraine-i Crimea nung totzü facility tem amak

**Moscow, Aami/June 21 (Agencies):** Ukraine-i drone amshia Crimea nung totzü bendena ayuba tesem aser facility tem amakba sülen nisung pezü tepsetogo, ta Russia-i amenoktsür aliba ketdangsürtemi ashir.

Crimea nung Moscow-i toktsüba lenir Sergey Aksyonov-i ashiba agi, Honibar aonung nungi Deobar anepdang tashi iba tesem amakba mapang nisung 28 yiruogo.

Kasa mapang nung Russia kübok Krasnodar tesem nung local ketdangsürtemi ashiba agi, Ukraine nung indang drone-i totzü shibelenba facility ka amak aser iba mapang passenger amenba rong ka nung nisung ka tepsetba den totzü terminal nung mi adoka liasü.

Russia indang Ministry of Defence-i ashiba agi, manger mesangwa tsungda Ukraine nung indang drone 239 khazüka yokogo.

Ukraine tir Volodymyr Zelenskyy-ia, Crimea kübok Kerch yimti nung totzü bendena ayuba tesem ka aser Krasnodar nung totzü shibelenba facility ka makogo, ta ashir.

Maneni social media channel balala nung Crimea kübok tesem balala nung bomb apokba aser mi adokba indang metetdaksüogo.

Telegram channel Krymsky Veter-i, Kerch nung totzü

ayuba tesem ka nung mi adokba indang osang agütsüogo.

Russia nung ketdangsürtemi Kerch aser Krasnodar na sendaktepba apu nung gari senzügenpong nokdanga liasü.

Ukraine-i tawa drone amshia Crimea aiben maka arudar, kong Russia indang Black Sea Fleet headquarter amenoka lir. Parnoki iba tesem nung totzü shibelenba lenmangtem maka totzü agi anünga kümdaksüogo.

Local power grid operator kati electricity network tem raksaba sülen tesem aika nung power makai akümba metetdaksüogo.

Moscow-i shimba Sevastopol Governor Mikhail Razvozhayev-ia Telegram ajanga totzü shibelenba nung tetsükdaksü adokogo aser Deobarnü nija gari atema petrol agütsütsü lemzüksü aliba magütsü, ta ashir.

Paisa, totzü ya official mapatem atema dang yua lir ta ashir.

Crimea' indang tourism sector-i, taküm lemluwa alima penzürtem aikati iba peninsula mesemdangtsü ta takzüktetogo. Iba tesem ya Russia nung alima penzürtem atema tongtibang tesem ka lir.

2014 küm Russia-i Crimea atsüng aser iba tesem ya 2022 küm February ita nungi Ukraine amaktsü atema amshidar.

## Vance aser Iran ketdangsürtem Switzerland tongogo

**Obbuergen, Aami/June 21 (Agencies):** Tehran indang nuclear sentong aser Iran nung rara tembangtsü asoshi tezüngzüktep ka khen atema yanglua aliba tajungba akumtsü asoshi jembishinü tenzüksü atema US Vice President JD Vance aser Iran ketdangsürtem Deobarnü Switzerland tongogo.

Iba framework ya taoba hopta zülutep aser tang US aser Iran ketdangsürtem tangatetep kati arutsü asoshi anogo 60 agia jembishinütsü.

United States den interim agreement zülutepa lia Honibarnü Iran kanga jashidakja Israel-i tanen makai Lebanon amaker, anungji Tehran-i Strait of Hormuz shibangogo ta sangdong aser jembishinü akatsü Switzerland-i oaka yangji kecha balaka mataloktsü amai lir ta ashir.

Agreement nung meyongnem agütsür anogo ishika tsungta iba tezüngzüktep tendanger ama Lebanon nung Iran-i yariba Hezbollah telungpur aser Israel tsungta rara tesashiba akum aser iba sülen Iran mitkari alima nung totzü aser natural gas shilem 20 shi abenba tongtipang tzi

lenmang ya shibangogo ta sangdong.

Jembishinütsü atema Vance-i Pakistan Ato Kilonser Shehbaz Sharif aser Staff Field Marshall Asim Munir mezüng ajuru, shirnok United States aser Iran tsungta odongtar ama inyaka aru.

Deobarnep Lake Lucerne anasa tebour tajung resort ka nung US, Iran aser odongtar Pakistan aser Qatar linüktem nungi ketdangsürtem adenshiba sülen Vance-i Munir ajurua liasü.

Deobarnü jembishinü nung Iran-i tongtipangsa tang Israel aser Lebanon tsungta rara aliba nung rangloksü, ta Iranian Foreign Ministry odongtar Esmail Baghaei-i Deobarnü Iran indang state news agency dang ashir.

Iran-i iba tezüngzüktep nungya Israel aser Hezbollah densema tesem ajunga nung rara anentsü akhanger. US-i ceasefire nung Israel dendaktsütsü makoker mesüra memulunger, ta Baghaei-i ashir.

Iran ketdangsürtema Pakistan aser Qatar odongtar tem den senden balaka amentsü aser iba sülen ang

US ketdangsürtem densema telok pezü senden amentsü.

"Meyongnem agütsüba dang nungibo zülutepa aliba mapa kuma inyakba tongtipangba lir," ta Baghaei-i Deobarnü ashir. Ajisüaka Iran tiri nuclear program temeden amshitsü ta ashir.

"Uranium yanglutsü temeden nungi onok kodanga marakzütsü aser aji tejangja, aser parnokia aji agizüksüla," ta Iran Tir Masoud Pezeshkian-i Deobarnü ashir.

Vance ya Hokulbarnü Lucerne anasa Buergenstock resort tonga arutsü liasü, saka Lebanon nung rara tesashiba akumba aser Iran ketdangsürtem jembishinü nung adentsü sentong athiba sülen pa United States nungi ayamesotsü menu.

Iran-i strait ano shibangogo ta jemiaka US Central Command-ibo US sepaitemi maneni iba tzi lenmang ajanga rong senzüdaksütsü atema tensa mita lir ta ashir. Vance-ia anogo ishika tsungta iba strait ajanga totzü barrels million aika ajangogo ta ashir.

Iran indang ken o jembirtem Switzerland tongogo ta Iranian state TV

ajanga ashiba sülen Vance ya US nungi ayamesoa liasü. Tehran nungi ibe ken o jembitsü atema parliamentary speaker Mohammad Bagher Qalibaf aser Foreign Minister Abbas Araghchi den central bank aser totzü ketdangsürtem arua lir.

US tatong tir den special envoy Steve Witkoff aser Tir Trump'er apang Jared Kushner arua lir. Witkoff aser Kushner na jelia arua liasü.

Vance aser pa kinungtsü second lady Usha Vance ya anepdang 6:00 ako (par mapang) atongtsü anasa Lucerne tezülen Emmen Air Base tonga aru.

Iba tezüngzüktep asoshi par külem party nungi züngsem temi Trump aser Vance kanga sashia aitsü, kong Republican hard-liners temi iba ya Obama administration ajanga nuclear agreement nung meyongnem agütsüba den kasa lir ta ashir, koba ajanga Iran nuclear sentong anentsüsa kecha meinyaktet, ta Trump aser GOP-i ashir.

Trump aser Iranian Tir Pezeshkian nati meyongnem agütsüba tezüngzüktep ya ajanga Tehran-i tenokdangba

makai totzü ayoktsü melar aser tang soita aliba rongsen sen dollar billion aika jenjang, agizüksü Iran nem lenmang lapoktsür. Iba tezüngzüktep nungsa Iran dang 'highly enriched uranium' ya meyokteptsü ashir, koba taoba küm US-i nuclear sites amakdang ali telung nung nembanga alitsü südi ta amanger.

Agreement nungya anogo 60 asoshi taa magütsü commercial rong tem Strait of Hormuz ajangtsü ashir, saka Iran-i sen meshia aruba tarutsü nunga meshitsü mesüra memeshitsü indang shia mali. Anogo 60 tsungta Iran den tezüngzüktep meyaglura US-ia strait nung tolls meshitsü, ta Trump-ia Honibarnü amokmerena lir.

US aser Iran tsungta tezüngzüktep nung Israel mesüra Hezbollah maden, anungji ken o tali benjar aser Israel Ato Kilonser Benjamin Netanyahu-i southern Lebanon nung Israel asoshi timtem aibatem mesamatsü tashi par sepaitem yangji alitsü ta nangzüka lir. Hezbollah-ia Lebanon nungi Israel mitkartem mainshi tashi amakba anentsü memulunger.

## Aphuyemi FC-i Nagaland Futsal Club C'ship asembenbubakokogo



**Kohima, Aami/June 21 (TYO):** Zunheboto nungi Aphuyemi FC-i 5buba Nagaland Futsal Club Championship 2026 final nung Kohima nungi Aspirants FC goal 5-3 agi koka iba asayamung asembenbubakokogo.

Iba asayamung final ya Riga Astro Turf, New Terogvunyu, Tseminyu nung Honibarnü asaya liasü.

Iba asaya akokba sülen Aphuyemi FC-i championship takok marok ajungketogo aser iba den senpet sen lakh 1 agizükogo. Takok marok aser senpet ya Nagaland Football Association (NFA) tir K. Neibou Sekhose-i agüja liasü.

Runners-up Team Aspirants FC nema NFA general secretary aser MLA Benei M. Lamthiu-i senpet sen 50,000 agüja liasü.

Maneni iba asayamung akokba Aphuyemi FC ya taruba küm National Futsal Championship nung Nagaland tenüing nungi asayatsü atema qualify süogo.

Zunheboto nung amendaker aliba iba club yagi iba state championship ya tang agi

asembenbubakokogo. Parnoki iba asayamung tanabuba aser pezübuba koka liasü.

Final asaya nung Aspirants FC nungi asayar Kedovolho Naprantsu-i minute 10, 11 aser 12buba nung kanga kara goal asem idaktsüba sülen parnok tejakdang aküm. Ajisüaka asaya mezüingbuba shilem matem tsüingda Aphuyemi FC-ia telangzüba tajung agüja Pulovi-i minute 13 aser 14buba nung goal ana idakja liasü.

Iba sülen Pulovi-i maneni par team atema minute 24buba nung goal tasembuba idakja hat-trick ka agütsü aser mapang tatsüka dang lir minute 32buba nung Hainding Disuang-i goal pezübuba idakja Aphuyemi pur tejakdang aküm. Goal pezübuba idaktsüba sülen minute ana dang lir Vinato Achumi-i par team atema goal pongububa idakja parnoki asaya akok.

Asaya tanabuba shilem nung Aspirants FC puri goal ka danga magütsüteni liasü. Asaya nung team anaprongla nungi asayar kaka nem yellow card agütsü.

Kasa anogo Aspirants FC-i

mezüingbuba semifinal asaya nung Tuensang nungi TRS FC goal 15-2 agi akok aser tanabuba semifinal asaya nung Aphuyemi-i Mon nungi SC Nagaland goal 4-3 agi koka liasü.

Asayamung coordinator Hethanglo Kath-i, anogo asem tashi iba asayamung asayaba mapang asaya 23 asaya, goal 167 idaktsü, yellow card teku aser red card ka agüja liasü ta metetdaktsü.

Ajak senteper district ti nungi team 10-i iba asayamung nung shilem agiogo, koba Nagaland Football Association (NFA)-i ayongzük aser Football Association Tseminyu District (FATD)-i host süa liasü.

Asayamung shibangba sentong ya Medolenuo Ambrosia Loucii lenisüba nung agi aser Hethanglo Kath-i asayamung indang osang agütsü. Sentong nungsa Divine Connection nungi Obed Kath-i ken tajung ka tena liasü. Asayamung shibangba sentong nung Tseminyu Deputy Commissioner Japheth Woch-a shilem agi.

## FIFA WC: Germany, Japan, Netherlands nungeri pei tata asaya kokogo

**Aami/June 21, 2026 (Agencies):** FIFA World Cup 2026 nung Deobarnü Toronto Stadium nung Germany-i goal ka agi Ivory Coast mekoki aliba nungi meyipa tur asaya kokogo.

Asaya nung Franck Kessie-i asaya mezüingbuba shilem nung Ivory Coast atema mezüingbuba goal idaktsü, ajisüaka Denis Undav substitute ama aitba sülen pai Germany atema goal ana idakja parnoki asaya akok.

Asaya mezüingbuba shilem nung Germany goal anasa asayatem meyoktepa asayaba sülen Kessie-i tia ka-a goal ka ya idaktsü. Asaya mezüingbuba shilem nung Germany atema Kai Havertz aser Pavlovich natia goal kaka idaktsü, saka offside asüba ajanga goal magi.

Iba sülen Julian Naglesmann-i Undav yok, shiba Curacao goal 7-1 agi akokba asaya nunga goal idaktsür liasü.

Arishi küm 29 tain Undav-i Germany atema minute 68buba nung mezüingbuba goal idaktsü aser mapang apuloktsür asayaba mapang tanabuba goal idakja parnoki asaya akok.

Tanga asaya ka nung Japan aser Tunisia na FIFA World Cup asaya 1000buba asaya ya Japan-i goal 4-0 agi kokogo aser parnok knockout round-i aitsü ana nung lir.

Asaya nung Ayase Ueda, Daichi Kamada aser Junya Ito nungeri Japan atema goal idakja parnoki asaya ayong ayonga akok aser Group F nung parnok Netherlands den kasasa point pezü ngua lir.

Tunisia-i iba asaya makokba tetezü parnok asayamung nungi tsükogo. Mezüingbuba asaya nung Sweden goal 5-1 agi makokba sülen parnok jenjang kanga mejungi aliba mapang nung ano Japan-a mekoki liasü.

Kasa asayamung nung Group F asaya tanga ka nung Netherlands-i goal 5-1 agi Sweden ayong ayonga kokogo.

Asaya nung FIFA World Cup puti otsü nung Netherlands nungi asayatem rongnung Brian Brobbey-i goal ana takaratiba idakja liasü. Pai minute 16 aser second 12 tsüingda goal ana idakja liasü.

Iba sülen asaya tanabuba shilem nung Cody Gakpo-i goal ana idaktsü aser minute 89buba nung Crysencio Summerville-i Netherlands atema goal pongububa idakja parnoki asaya akok.

Netherlands pur tang FIFA World Cup asaya 14 nung khendanga tamakok mongui asaya arudar (penalty nung tamakok anguba medeni). Parnoki asaya teku akok aser pezü draw süa liasü.

Maneni Honibarnü Ecuador den asayaba mapang Curacao goalkeeper Eloy Room-i otsü tasen ka yanglua goal aitsü aliba aika kümzüka sülen parnoki tang mezüingbuba World Cup nung point ka ngutetogo. Iba asaya ya team anapronglai goal kaka danga magütsüteni tembanga liasü.

Germany goal 7-1 agi makokba sülen Curacao pur World Cup nung tanabuba asaya atema Kansas City-i ao, aser goalkeeper Eloy Room-i kanga junga asayaba ajanga parnok tamakoker rongnung maden.

Asaya ya Ecuador-i amokbanger asaya aser parnoki target nung ball 28 metsüoktsü, saka Miami FC goalkeeper yagi goal aitsü aliba ball 15 tashi kümzüka liasü. Pai ball 15 tashi kümzüka ya 1966 küm sülen World Cup asaya nung goal keeper kati ball timtiba kümzüka asütsü.

## Casemiro-i Inter Miami nung adentsü mulunga agizükogo



**Aami/June 21, 2026 (Agencies):** MLS club Inter Miami nung adentsü atema o agibo mulungtepba sülen Casemiro iba club nung adentsü ana nung lir.

Transfer expert Fabrizio Romano-i ashiba agi, telok ajaki tenangzüktepba ka yanglutsü atema mulungtepogo aser iba ajanga Brazil nunger midfielder

ya Manchester United toktsüba sülen United States nung maneni asayatsü atema lenmang lapoktsüogo.

Arishi küm 34 tain asayar yagi taküm lemluwa United den tenangzüktepba meyanglushitsü atema telemtetba agiba sülen free agent ka aküm. England nung asayaba mapang FA Cup aser EFL Cup akokba nung

Casemiro-i United nem teyari agütsü.

England nung oa masaya tsüingda Casemiro Real Madrid nungi asayaba mapang La Liga titles asem UEFA Champions League trophies pongu koka pa ya par putu nung midfielder tem rongnung takok tajungtiba anguba asayar ka aküm.

Pa Inter Miami-i ora ano club nung nungtugu asayar ka bendenloksü, kong Messi-i anir nungtugu asayar aika lir. Argentina nunger asayar yagi anir Miami puri 2025 küm MLS Cup title aben. Iba season Messi-i goal 29 idaktsü. Tang asaya aliba season nunga pai goal 12 bo idaktsür lir, koba FIFA World Cup atema khen anena lir.

Miami pur Eastern Conference nung tang tanabuba

jenjang nung lir aser parnok domestic aser continental asayamungtem akoktsü merangba mapang Casemiro ya parnok asoshi tongtibang asayar ka asütsü ta amanger.

Brazil nunger asayar ya international jenjang nung Brazil tenüing nungi maneni asayadar. Pa tang asaya aliba FIFA World Cup nung Brazil asaya anaprongla nung tetenzük nungi asayaogo aser Hokolbarnü haiti goal 3-0 agi akokba asaya nung pa minute 90 prongla asaya liasü.

Casemiro Miami nung adentsü atema mulungtepogo,

saka pa officially Inter Miami asayar ka akümstsü asoshi tetsükdaktsü ka lir.

LA Galaxy ket nung midfielder indang MLS discovery rights lir, koba league inyakyim ka lir aser iba ajanga MLS-i aitba asayatem kar atema sensaksemstsü asoshi club tem nem tama maongka agütsür.

Ibayongji Inter Miami pur mezüingbuba discovery rights ken o ya bentettsü nungdaker. Sensaksembo tenzükogo, saka ken o mebantet tashi Casemiro iba club nung adenba ya unofficial asütsü.

### **BILEMDANGANG**

**"Chichiba leperji ali telung nung masü nisung mulungjang nung lir."**